

COMUNICATO n. 2674 del 27/09/2025

Manà fora su Trentino Tv l program l vegn endrezà dal Comun General de Fascia

“Pedies”: per en sabeda ai 27 de setember vegn fora la puntata #505 del program ladin per la televizion

[Ladino] Ence chesta setemèna l é a la leta l nef apuntament de “Pedies”, rotocalch ladin de informazion, ruà a la puntata n. 505.

I argomenc che porton dant te Pedies de chesta setemèna l é:

L Dì dla Cultura Ladina stat en domenia passèda vin Badia olache l é stat fat na conferenza de carater scientific e la consegna de la pruma Onoranza al Merit Ladin. Dantmesdì l é stat portà dant referac scientific entorn la tematica de la conties ladines co la consegna del dossier per l recognosciment desche patrimonie imaterièl de l’umanità. Domesdì l era laboratories desvalives e dò l moment segnificatif de la consegna de la pruma onoranza al merit ladin data al prof. Lois Craffonara per egn alalongia diretor del Istitut Cultural Micurà de Rü. L se trata de n studios che l se à dat ju trop con enrescides e publicazions de linguistica, èrt, storia e letradura che les à dat nonzech a la mendranza ladina ence foravia.

La festa fata a Soraga per la desmonteèda con bronsins e gherlandes da fiores per la vaces ben fornides per l’ocajon. Na festa metuda a jir dai voluntadives del paisc con musica, gropes de folclor e prodoc de artejanat e da magnar. La scomenzadiva la se lea ence al Festival del Spretz Tzaorì che la vegn metuda a jir semper de setember anter Soraga e Moena. Ence per chesta rejon la Mèlga de Fascia l à portà dant na desmostrazion de coche vegn fat l formai Spretz Tzaorì DOP n prodot ezelent n muie cognosciù che l caraterisea nosc raion.

L Chino Marmolada de Cianacei l à endò avert i ujes co na neva aria joena. La struttura defat la é stata tutta te man da la sociazion culturèla Kino, con a cef l President Lorenzo Dezulian. L’intenzion l é chela de meter a jir desvaliva scomenzadives per i joegn de Fascia. Lorenzo te sia intervista l ne met en consaputa de la desvaliva scomenzadives, de la idees e de la proponetes de chesta neva gestion.

I reports de chesta setemèna i é stac enjigné e porté dant da Angela Pederiva e Riccardo Zanoner.

Metù a jir col sostegn del Comun General de Fascia, de la Provinzia autonoma de Trent e de la Region autonoma Trentin – Südtirol, “Pedies” l va fora su **Trentino Tv – canal 10 Prov. de TN**- vigni sabeda da les 18.00 (sie da sera), de domenia da les 13.30 (mesa la does domesdì) e de lunesc da les 11.30 (mesa les doudesc).

L program ades l va fora ence sun **AltoAdige TV – canal 11 de BZ** - vigni domenia da les 18.00 (sie da sera).

Se pel veder duta la puntates ence sul canal YouTube de TV Ladina sot chest link:
<https://www.youtube.com/@TvLadina>

opuramenter se pel veder i servijes un a un su la piata Facebook de TV Ladina.
<https://www.facebook.com/TelevijionLadina>

Traduzion di Servijes Linguistics e Culturèi del Comun general de Fascia

(cdt)